



Inatsisartunut ilaasortaq
Akitsinguaq Olsen
Siumut

Avataasiorluni raajarniarnermut tunngatillugu § 37 naapertorlugu apeqqummut akissut.

Asasara Akitsinguaq Olsen.

Avataasiorluni raajarniarneq pillugu apeqquutigisatit matumuuna akissuteqarfigissavakka.

1. Ingerlatseqatigiiffiit avataasiorlutik rajaarniarnermik ingerlatsisut 2010-mi qanoq annertutigisumik katillugit isertitaqarpat?

Naatsorsuutit massakut saqqummiunneqartartut naapertorlugit ingerlatseqatigiiffiit avataasiorlutik raajarniarnermik ingerlataqartut qanoq kaaviaartitsisarnersut naatsorsorneqarsinnaanngilaq, soorlu assersuutigalugu Royal Greenland A/S-ip kilisaataatimi kaaviaartitai immikkut naatsorsorneq ajorpai, suliffeqarfissuulli tamakkiisumik kaaviaartitaanut ilanngunneqartarlutik, soorlutaaq ingerlatseqatigiiffiit ataasiaakkaat kaaviaartitait kisitsisinnngorlugit ilisimatitsissutigineq ajoraat.

Ingerlatseqatigiiffiit taakku marluusut minillugit 2010-mi kaaviaartitait tamakkerlutik 612 mio. kr. missaaniipput, ileqqorissaarnissarli eqqarsaatigalugu oqaatigineqassalluni kisitsisini taakkunani ingerlatseqatigiiffimmi pineqartumi ingerlatat allat ilaaratarsinnaammata, taamaakkaluartorli kaaviaartitait ilamininngui kisimik tamakkunaneersuussangatinneqarput.

2. Ingerlatseqatigiiffiit avataasiorlutik raajarniarnermik ingerlatsisut 2010-mi qanoq amerlatigisunik selskabsskat-imut akiliuteqarpat?

Ingerlatseqatigiiffiit akileraarutitigut akitsuutitigullu akiliutigisartagaat assigiinngitsumik katitigaapput, taakkununnga ilaalluni ingerlatseqatigiiffiit akileraarutigisartagaat.

Ukiumi aningaasarsiorfiusumi 2010-mi ingerlatseqatigiiffiit tapit ilanngullugit kr. 6.955.000-inik ingerlatseqatigiiffiit akileraarutaasut akiliuteqarput.

Tamatuma saniatigut ingerlatseqatigiiffiit ukiumi 2010-mi raajanut akitsuummik kr. 21.569.000-inik akiliuteqarput.

Ingerlatseqatigiiffiit iluanaarutiminnit 2010-mi kr. 9.030.000-inik akileraaruteqarput.

2010-mi ingerlatseqatigiiffiit akileraarutitit akitsuutinullu katillugit kr. 37.554.000-inik akiliuteqarput.

Inussiamnersumik inuulluaqqusillunga

Maliina Abelsen

Den 17. februar 2012
Sagsnr.
Dok. Nr.

Postboks 1605
3900 Nuuk
Tlf. (+299) 34 50 00
Fax (+299) 32 20 42
E-mail: tax@gh.gl
www.nanoq.gl